

O D L U K A
O OGRANIČAVANJU MARŽE ZA POJEDINE ŽIVOTNE NAMIRNICE
I DRUGE PROIZVODE ¹

("Službeni glasnik BDBiH", broj 13/26)

Član 1.

Ovom odlukom određuje se ograničavanje marže za pojedine životne namirnice i druge proizvode, radi zaštite životnog standarda.

Član 2.

Kao mjeru neposredne kontrole cijena iz člana 1. ove odluke propisuje se za pojedine životne namirnice i druge proizvode utvrđivanje maksimalne visine marži u trgovini (kalkulativne cijene).

Član 3.

Mjera o ograničavanju marže iz člana 2. ove odluke odnosi se na pojedine životne namirnice i druge proizvode koje prodaju preduzeća, preduzetnici, podružnice i druga pravna lica koja se bave prometom robe na veliko, odnosno na malo, a u skladu s članom 8. stav (đ) Zakona o regulisanju cijena u Brčko distriktu Bosne i Hercegovine.

Član 4.

(1) Pravna i fizička lica iz člana 3. ove odluke obavezna su utvrditi i primjenjivati marže tako da iste u veleprodaji ne prelaze maksimalnu visinu od 6% i u maloprodaji maksimalnu visinu od 8% na nabavnu cijenu.

(2) Obaveza iz stava (1) ovog člana odnosi se na sljedeće proizvode:

1. bijelo pšenično brašno,
2. sve vrste hljeba napravljene od bijelog pšeničnog brašna,
3. mlijeko, pasterizovano i sterilizovano pakovanje od 1 litra mm 2,8% i pasterizovano mlijeko pakovano u plastičnu foliju 1 litra,
4. jogurt, pakovanje od 1 litra mm 2,8% i jogurt pakovan u plastičnu foliju 1 litra,
5. šećer kristal, bijeli, pakovanje od 1 kg, 2 kg i 5 kg,
6. kuhinjska so za ljudsku ishranu pakovanje od 1 kg,
7. jestivo ulje suncokretovo, pakovanje 1 litra i 5 litara i biljna mast,
8. svinjska mast,
9. margarin pakovanje 250 g i 500 g,
10. formule za dojenčad i formule nakon dojenja, isključivo zamjena za majčino mlijeko,
11. pelene za jednokratnu upotrebu za djecu i odrasle,
12. deterđžent za suđe, tečni – pakovanje do 1 litra,
13. deterđžent za rublje u prahu pakovanje od 3 kg i 5 kg.

¹ Odluka je objavljena u „Službenom glasniku BDBiH“, broj 13/26 od 30. aprila 2026. godine, stupila je na snagu 15. aprila 2026. godine, a važi do 15. jula 2026. godine. Odluka je donijeta na osnovu člana 65. Zakona o trgovini BDBiH („Službeni glasnik BDBiH“, br. 40/04, 19/07 i 11/20) i članova 7. stav (1) tačka g), 8. i 9. Zakona o regulisanju cijena u BDBiH („Službeni glasnik BDBiH“, broj 13/22).

Član 5.

(1) Ako preduzeće, preduzetnik, podružnica ili drugo pravno lice nabavi robu neposredno od proizvođača i obavi samo promet na malo, može pri obrazovanju cijena proizvoda u prometu na malo maržu povećati do 25% od propisane marže u prometu na veliko.

(2) Ako proizvođač direktno razvije svoju maloprodajnu mrežu, odnosno registruje pored proizvodne i prometnu djelatnost, maržu može obračunati u skladu sa stavom (1) ovog člana.

Član 6.

(1) Pod nabavnom cijenom proizvoda u prometu na veliko, odnosno malo, u skladu s članom 4. ove odluke, podrazumijeva se fakturna cijena proizvođača, odnosno dobavljača, uvećana za zavisne troškove nabavke, te prodajne troškove u prometu na veliko.

(2) Marža se obračunava na nabavnu cijenu proizvoda iz stava (1) ovog člana.

Član 7.

(1) Pod zavisnim troškovima, u smislu ove odluke, podrazumijevaju se carinski troškovi, troškovi špediterskih usluga i ostali troškovi nastali prilikom uvoza, troškovi utovara i istovara proizvoda, troškovi transporta od stovarišta dobavljača do stovarišta kupca, troškovi osiguranja proizvoda u transportu, transportni kalo, lom i kvar proizvoda, posebni troškovi pakovanja proizvoda u transportu, troškovi transporta od stovarišta kupca do njegovih prodavnica, odnosno prodajnih mjesta, troškovi povrata ambalaže na osnovu zaključenih ugovora.

(2) Kao zavisni troškovi iz stava (1) ovog člana mogu se zaračunati troškovi koje je imalo i kupcu fakturisalo drugo preduzeće, preduzetnik, podružnica ili pravno lice, odnosno troškovi planirani internim aktom kupca ako te usluge vrši samo kupac do visine koju bi kupcu fakturisalo drugo preduzeće, preduzetnik, podružnica ili pravno lice.

(3) Pod prodajnim troškovima u prometu na veliko, u smislu ove odluke, uzimaju se u obzir transportni troškovi od prodavca do kupca i sve vrste rabata.

Član 8.

Popis zaliha zatečene robe vrši se prije svake promjene cijena, izuzev ukoliko popis zaliha nije evidentiran unutar poslovnog programa.

Član 9.

(1) Vrijednosti popisanih zatečenih zaliha proizvoda iz člana 4. stav (2) i obračun nabavne cijene vrši se u skladu s međunarodnim računovodstvenim standardom 2-zalihe (FIFO ili metod ponderisanih prosječnih zaliha).

(2) Valorizaciji cijene robe u prometu pristupa se onda kada su cijene te robe na tržištu veće, a postojeće zalihe zatečene robe u prodajnom objektu se ne znavljaju.

Član 10.

Obračun nabavne cijene i valorizacija cijene iz člana 9. u prodajnom objektu zapisnički se konstatuje, a ovjereni zapisnik zavodi se u trgovačku knjigu.

Član 11.

Inspeksijski nadzor nad primjenom odredaba ove odluke vrši Ured gradonačelnika Brčko distrikta Bosne i Hercegovine – Inspektorat u skladu s propisom kojim je regulisana oblast inspekcija.

Član 12.

U pogledu prekršajnih odredaba primjenjuju se odgovarajuće odredbe člana 13. i člana 13a. Zakona o regulisanju cijena u Brčko distriktu Bosne i Hercegovine.

Član 13.

Ova odluka stupa na snagu danom donošenja, bit će objavljena u „Službenom glasniku Brčko distrikta Bosne i Hercegovine” i važi do 15. 7. 2026. godine.